

Angajoqqaat oqartussaanerat il.il. pillugit Kalaallit Nunaanni nalunaarut

Angajoqqaat akisussaanerat pillugu inatsimmi § 42 aamma § 45, imm. 3, kunngip peqqussutaatigut nr. 680, 6. juni 2016-imeersukkut atuutilersinneqartoq naapertorlugu aalajangersarneqarpoq:

Kapitali 1

Angajoqqaat oqartussaanerat

Angajoqqaat oqartussaanerat pillugu isumaqatigiissutinik Naalagaaffiup Sinniisuanut nalunaaruteqartarnek

§ 1. Angajoqqaat ataatsimut oqartussaanerat pillugu isumaqatigiissummik Naalagaaffiup Sinniisuanut nalunaaruteqartarnek, tak. peqqussummi § 9, angajoqqaat ataatsimut oqartussaanerisa unitsinneqartarnerat, tak. peqqussummi § 10, imaluunniit angajoqqaat oqartussaanerisa angajoqqaajusumiit angajoqqaataasumut nuunneqartarnera, tak. peqqussummi § 13, imm. 1, pisassapput immersugassatigut, Ankestyrelsimit, Familieretsafdelingimit akuerisaasukkut.

Imm. 2. Meeraq nunami allami inunnorsimappat, angajoqqaat ataatsimut oqartussaanerat pillugu isumaqatigiissuteqarnermi aamma angajoqqaat oqartussaanerat angajoqqaajusumiit angajoqqaataasumut nuunneqarnissaa pillugu isumaqatigiissuteqarnermi ilanngunneqartassaaq uppersaataat ataatsimut qitornarisap isumaqatigiissummi pineqarnera pillugu.

Imm. 3. Nalunaaruteqarnek pissaaq kingusinnerpaamik qaammatit marluk qaangiunneranni angajoqqaap siulliup immersukkamik atsioreneraniit. Immersugaq atsiugaq ulluligarlu ilanngussartalik Naalagaaffiup Sinniisuata tiguppagu, tak. imm. 2 nalunaarutiginninneq pissaaq. Immersukkap tigonera Naalagaaffiup Sinniisuata uppersaasissavaa taassumalu assilinera uppersaatalik angajoqqaajusunut nassiutissallugu.

Imm. 4. Angajoqqaat ataatsimut oqartussaanerisa atorunnaarnera pillugu isumaqatigiissummik nalunaarut imaluunniit angajoqqaat oqartussaanerisa angajoqqaajusumiit allamut meeqqap inunnunginnerani pilersinneqartumut nuussineq pillugu nalunaarut imaluunniit angajoqqaat oqartussaanerata piffissamik killilerneqarneranik imaluunniimmi angajoqqaat oqartussaanerat pillugu piumasaqaatalinnik isumaqatigiissut pillugu nalunaarutit tiguneqarsinnaanngillat.

Angajoqqaat oqartussaanerat pillugu isumaqatigiissutinik Naalagaaffiup Sinniisuata akuersissuteqartarnera

§ 2. Allat meeqqap angajoqqaarinngisaasa angajoqqaatut oqartussaassusillit akornanni angajoqqaatut oqartussaanerata nuunneqarnissaa pillugu isumaqatigiissutip akuerineqarnissaanik qinnuteqaateqarnermi, tak. peqqussummi § 13, imm. 2, isumaqatigiissummi inatsisitigut sunniutissat pillugit illuatungeriit Naalagaaffiup Sinniisuata ataatsimiigiaqqussavai ilitsersussallugillu.

Imm. 2. Meeraq nunami allami inunnorsimappat, meeqqamut angajoqqaajussuseq pillugu uppersaataat ilanngunneqassaaq. Aappariit ataatsimoortillugit angajoqqaatut oqartussaassuseqalersinneqassappata, aappariinneq pillugu uppersaataat ilanngunneqassaaq.

Imm. 3. Angajoqqaatut oqartussaassutsip nuunneqarneranut aningaasarsiaqartitsisoqassappat, tamanna qinnuteqaammi paasissutissiissutigineqassaaq.

Imm. 4. Ataatsimiinnissaaq imm. 1-imi taaneqartoq, siusinnerpaamik aatsaat pisinnaavoq meeqqap inunnorneraniit qaammatit 3 qaangiunneranni.

Imm. 5. Illuatungeriit pillugit aamma meeraq pillugu oqaaseqaateqartoqarnissaanik kommuni Naalagaaffiup Sinniisuata qinnuigisinnaavaa.

§ 3. Angajoqqaatut oqartussaanerup nuunneqarnerani aningaasarsiaqartitsisoqarsimappat aningaasarsiat ingerlatsiviup immikkoortuanut akuerisaasumut meeqqap atugaanut ikineqassanersut Civilstyrelsip piginnaatitsereerneratigut Naalagaaffiup Sinniisuata aalajangissavaa, taamatullu pisoqassappat tamatumingga ingerlatsiviup immikkoortuanut nalunaaruteqassalluni.

Imm. 2. Sulinikkut isertitassaagaluanit annaasat angajoqqaatut oqartussaasumut aningaasarsissutaasimappata imaluunniit akilerneqarsimappata, isumaqatigiissut akuerineqarsinnaanngilaq.

§ 4. Peqqussummi § 13, imm. 2 malillugu aalajangiisoqannginnerani, tak. peqqussummi § 36, imm. 1, angajoqqaq, angajoqqaatut oqartussaassuseqarnermi peqataanngitsoq uppersaammik pissarsiffigeqqaarneqassappat, peqqussummi § 14 malillugu angajoqqaatut oqartussaanerup nuunneqarsinnaanera pillugu Naalagaaffiup Sinniisuata pineqartoq ilitersussavaa.

Imm. 2. Angajoqqaajusoq angajoqqaatut oqartussaassuseqarnermut peqataanngitsoq akerliugaluarpalluunniit peqqussummi § 13, imm. 2 malillugu angajoqqaatut oqartussaanerup nuunneqarnissaa pillugu isumaqatigiissutip akuersissutiginiisaanut piunasaqaatit naammassineqarsimappata, Naalagaaffiup Sinniisuata angajoqqaajusut nalunaarfigissavai, ullup Naalagaaffiup Sinniisuata killiliussaata qaangiutereernerani isumaqatigiissut Naalagaaffiup Sinniisuaniit akuersissutigineqassasoq. Suliaq Ankestyrelsimut, Familieretsafdelingimut ullup killiliussap taassuma naannginnerani suliakkiutigineqarpat, suliaq taanna aalajangiiffigineqareersinnagu, isumaqatigiissut akuersissutigineqarsinnaanngilaq.

§ 5. Ataatsimiinnissamut § 2, imm. 1-imi taaneqartumut illuatungeriit ataatsikkut ataatsimiigiaqquneqassapput. Taamaattorli illuatungeriit immikkoortillugit Naalagaaffiup Sinniisuata ataatsimiigiaqqusinnaavai, Naalagaaffiup Sinniisuata nalilerpagu tamanna pissusissamisoornerussasoq, pingaartumik pissutsit atuuttut nunap qanoq issuanut tunngasut pissutigitillugit. Pisut najoqqutaralugit ataatsimiinnissaq oqarasuaatikkut pisinnaavoq.

Imm. 2. Illuatungeriit arlaat marluullutilluunniit Danmarkimi, Savalimmiuni imaluunniit nunami allami najugaqarpata imaluunniit tassaniikkallarpat, ataatsimiittoqarnissaa pillugu naalagaaffiup ingerlatsisoqarfia, Savalimmiuni Naalagaaffiup Sinniisua imaluunniit danskit sinniisoqarfiat, Naalagaaffiup Sinniisuata qinnuigisinnaavaa.

§ 6. Ataatsimiinnissamut § 2, imm. 1-imi taaneqartumut illuatungeriit takkutinngippata qinnutigisat atorunnaarsimasutut isigineqassaaq. Illuatungeriit arlaat takkutinngippat, illuatungeriit nutaamik ataatsimiigiaqquneqassapput, qinnutigisat atorunnaarsimanera paasineqarsimanngippat. Illuatungeriit arlaat marluullutilluunniit ataatsimiinnissap aappaanut takkutinngippata, qinnutigisat atorunnaarsimasutut isigineqassaaq.

Angajoqqaatut oqartussaaneq pillugu isumaqatigiissutinik eqqartuussivimmuut nalunaaruteqartarneq

§ 7. Angajoqqaat ataatsimut oqartussaanerat pillugu isumaqatigiissut, tak. peqqussummi § 9, angajoqqaat ataatsimut oqartussaanerisa unitsinneqarnera, tak. peqqussummi § 10, imaluunniit angajoqqaatut oqartussaanerup angajoqqaajusumiit angajoqqaataasumut nuunneqarnera, tak. peqqussummi § 13, imm. 1, pillugit isumaqatigiissutit eqqartuussivimmuut nalunaarutigineqartillugit tamanna eqqartuussiviup allattaaviannut allanneqassaaq allatallu assilinera angajoqqaajusunut tunniunneqassalluni. § 1, imm. 4 taamatuttaaq atuuppoq.

Kapitali 2

Sulianut meeqqanut tunngasunut paasisimasalimmik siunnersorneqarnissaq aamma aaqqiagiinnngittoqartillugu isumaqatigiissaarisarneq

§ 8. Sulianut meeqqanut tunngasunik paasisimasalittut siunnersuisoqarnissaa imaluunniit aaqqiagiinngissutinik isumaqatigiissaarisoqarnissaa Naalagaaffiup Sinniisuata neqeroorutigippagu, neqeroorutip akuerinissanut Naalagaaffiup Sinniisua piffissamik killiliisinnaavoq.

§ 9. Sulianut meeqqanut tunngasunut paasisimasalittut siunnersorneqarnissamik neqeroorfigineqarnermut peqatigitillugu, § 11, imm. 1-4-p imaanik angajoqqaat meerarlu saqqummiussiffigineqassapput.

Imm. 2. Siunnersuinissami angajoqqaajusut marluullutik peqataanissaat piunasaqaatigineqanngilaq. Siunnersorneqarnissamut aggeqqusineq pisinnaavoq angajoqqaajusut aappaannaaluunniit imaluunniit meeraq peqataassappat. Siunnersorneqarnissaq pillugu ataatsimiinnissamut takkutinnngitsup siunnersorneqarnissaa Naalagaaffiup Sinniisuata itigartitsissutigisinnaavaa. Angajoqqaajusut marluullutik peqataannnginnerisigut siunnersuinissaq siunertaqanngitsutut isigineqarpat, tassanissaaq siunnersuinissaq Naalagaaffiup Sinniisuata itigartitsissutigisinnaavaa.

Imm. 3. Siunnersuinissaq taassumalu annertussusissaa Naalagaaffiup Sinniisuata pilersarusiussavaa.

Imm. 4. Naalagaaffiup Sinniisuata suliamik suliarinninnera unitsikkallarnejassaaq siunnersuinerup naammassineqarnissaata tungaanut.

§ 10. Aaqqiagiinngissummik isumaqatigiissaarinissaq pillugu saqqummiussiffigineqarnermut peqatigitillugu § 11, imm. 1, 2 aamma 6-ip imaanik angajoqqaat paasitinneqassapput.

Imm. 2. Aaqqiagiinngissummik isumaqatigiissaarinissamut angajoqqaajusut marluullutik peqataanissaat piunasaqaatigineqarpoq.

Imm. 3. Aaqqiagiinngissummik isumaqatigiissaarinissaq Naalagaaffiup Sinniisuata pilersarusiussavaa taassumalu annertussusissaa aalajangissallugu.

Imm. 4. Naalagaaffiup Sinniisuata suliamik suliarinninnera unitsikkallarnejassaaq aaqqiagiinngissummik isumaqatigiissitsiniarnerup naammassineqarnissaata tungaanut.

§ 11. Siunnersuinerup imaluunniit isumaqatigiissaarinerup nalaani angajoqqaajusut meeqqalluunniit paasissutissiissutigeriigaat pissarsiariniarneqassanngillat Naalagaaffiup Sinniisuata suliamik aalajangiiniarnerani. Paasissutissat taama ittut, sulianut meeqqanut tunngasunut paasisimasalimmit imaluunniit isumaqatigiissaarisumit ingerlateqqinneqassanngillat suliap aalajangiiffiginissaanut, taamaattorli takuuk imm. 2. Paasissutissat taama ittut suliffeqarfiup iluani suliamik suliarinninnermi atornejartut aamma angajoqqaajusunut meeqqamulluunniit tunniunneqassanngillat, taamaaliornissaq inatsisinik allanik malitaqarluni pissanngippat.

Imm. 2. Aaqqiagiinngissummik isumaqatigiissaarineq imaluunniit siunnersuineq inaarlugu naammassineqarpat, isumaqatigiissaarisup imaluunniit sulianut meeqqamut tunngasunut paasisimasallip Naalagaaffiup Sinniisoqarfiani sulianik suliarinnittumut nalunaarutigissanngilai suliami qanoq isumaqatigiittoqarsimanera imaluunniit Naalagaaffiup Sinniisuata suliamik suliarinnilluni ingerlatitseqqinnissaa pillugu.

Imm. 3. Angajoqqaajusut imaluunniit meeqqap akuerippassuk, siunnersuinerup nalaani pineqartoq pillugu paasissutissat pissarsiariniarneqarsinnaassasut imaluunniit ingerlateqqinneqarsinnaassasut, uani § 1 atuutissanngilaq.

Imm. 4. Naalagaaffiup Sinniisoqarfiani sulianik suliarinnittartoq siunnersuinermi peqataaqullugu angajoqqaajusut qinnuigisinnaavaat. Sulianik suliarinnittartoq peqataassappat, uani § 1 atuutissanngilaq.

Imm. 5. Suliap suliaralugu ingerlateqqinnissani atugassatut sulianut meeqqanut tunngasunut paasisimasallip siunnersuineq tunngavigalugu oqaaseqaasiornissaa pillugu isumaqatigiittoqarsinnaanerani Naalagaaffiup Sinniisuata angajoqqaajusut ilitersorsinnaavai.

Imm. 6. Tamanna pillugu angajoqqaajusut isumaqatigiikkunik qinnutigisinnaavaat isumaqatigiissaarinerup nalaani isumaqatigiissut allaganngortitaq Naalagaaffiup Sinniisoqarfiani sulianik suliarinnittartumut ingerlateqqinneqassasoq.

Kapitali

3

Oqaloqatiginninnermi meeqqap ilaatinneqarnissaa

§ 12. Naalagaaffiup Sinniisua aalajangerpat meeraq oqaloqatiginninnermi ilaatinneqassasoq, oqaloqatigiinneq taanna suliami meeqqamut tunngasumut paasisimasalimmit sapinngisamik ingerlanneqassaaq.

Imm. 2. Oqaloqatiginnermut atatillugu siunnersorneqarnissamik meeraq neqeroorfigineqarsinnaavoq.

Imm. 3. Oqaloqatiginninnissaq sioqqullugu oqaloqatigiinnissap pissusissaanik pingaarutaanillu angajoqqaajusut ilisimatinneqassapput, tamanna pisariaqanngitsutut nalilerneqanngippat.

Kapitali

4

Nuunnissaq pillugu ilimasaarisussaataaneq

§ 13. Nuunnissaq pillugu angajoqqaat akornaanni ilimasaarinissaq peqqussummi § 18 malillugu pissaaq Naalagaaffiup Sinniisua imaluunniit eqqartuussivik ilaatinngikkaluarlugu.

Kapitali

5

Meeqqat illersorneqarnissaat pillugu nunat tamat Haagimi isumaqatigiissutaat malillugu suliassat

Pisinnaasassanik nuussineq

§ 14. Suliami peqqussut malillugu Naalagaaffiup Sinniisuata suliarisinnaasaani Meeqqat illersorneqarnissaat pillugu nunat tamat Haagimi isumaqatigiissutaanni aalajangersagaq 8 imaluunniit 9 malillugu pisinnaasat nuunneqarnissaat pillugu nunat allat oqartussaasuinit qinnuteqaateqarnermi, suliassaq Naalagaaffiup Sinniisuanut tunniunneqassaaq.

*Angajoqqaat oqartussaanagerat
pillugu uppernarsaat*

§ 15. Angajoqqaattut oqartussaassusillip qinnuteqarneratigut angajoqqaatut oqartussaaneq danskit inatsisaat malillugu pippat, meeraq Kalaallit Nunaanni najugalik pillugu angajoqqaatut oqartussaaneq Naalagaaffiup Sinniisuata uppernarsaasiorsinnaavaa.

Imm. 2. Uppernarsaat pilersinneqassaaq immersugassakkut Ankestyrelsip, Familieretsafdelingip akuerisaatigut.

§ 16. Pissutsit allanngorsimappata imaluunniit uppernarsaatip imaa ilumoortuunngippat, uppernarsaat § 1 malillugu pilersinneqarsimasoq Naalagaaffiup Sinniisuata utertissinnaavaa.

Kapitali 6

Naammagittaalliuuteqarneq il.il.

§ 17. Ankestyrelsip, Familieretsafdelingip suliarisassavai, Naalagaaffiup Sinniisuata aalajangiineri pillugit naammagittaalliuutit, Meeqqat illersugaanissaat pillugu nunat tamat Haagimi isumaqatigiissutaanni § 41, imm. 1, aalajangersagaq 8 aamma 9-mi aamma nalunaarummi uani § 16-imi ilanngunneqarsimasut. Naammagittaalliuut Naalagaaffiup Sinniisuanut tunniunneqassaaq, taannalu suliami allagaatit ingerlateqqillugit nassiutissalugit Ankestyrelsimut, Familieretsafdelingimut.

§ 18. Aalajangiineq naammagittaalliuutaasoq Naalagaaffiup Sinniisuata suliareqqilersinnaavaa, ima pisoqarpat:

- 1) Naammagittaalliuut qinnuteqaammik ilaqarpat Naalagaaffiup Sinniisuata isummerfigisinnaanngisaanik,
- 2) Naammagittaalliuut paasissutissanik nutaanik annertuunik imaqarpat,
- 3) Paasissutissanik pingaarutilinnik peqarpat, Naalagaaffiup Sinniisuata isummerfigisimannngisaanik, imaluunniit
- 4) Suliamik suliarinninneq kukkuneqarsimappat, aalajangiinermut pingaaruteqarsinnaasunik.

Imm. 2. Suliap suliareqqilernissaanik Naalagaaffiup Sinniisuata aalajangiinera naammagittaalliuuteqartup Ankestyrelsimut, Familieretsafdelingimut, naammagittaalliuutigisinnaavaa.

Kapitali 7

Atuutilersinneqarnera

§ 19. Nalunaarut atuutilersinneqarpoq ulloq 1. juli 2016.

Isumaginninnermi Nunamilu Namminermi Pissutsinut ministereqarfik, ulloq 19. juni 2016

KAREN ELLEMANN

/ Malene Vestergaard